

光緒山西通志

鄉賢錄十五

錄二之十五

山西通志卷三十

賜進士出身頭品頂戴兵部侍郎兼都察院右副都御史巡撫山西提督軍務臣張爾攀

旨監修

明 嘉靖隆慶

周鈇字汝威榆次人嘉靖五年進士授行人擢御史巡按陝西邊將多殺被俘來歸民鈇請嚴禁有報降五人以上者賞之詔可再按山東特改右春坊清紀郎兼翰林院侍書俺答入寇鈇以中樞無籌策請早爲計責降虜州府知事旋改國子監丞擢吏部文選主事坐與王與齡發嚴嵩等私屬事貶河間通判已而吏部擬擢南京吏部主事嵩言鈇調官甫四月不得驟遷上詰責尙書許讚鐫文選郎鄭曉三級鈇等褫職爲民廷臣論薦鈇以嵩在位不復召穆宗初贈光祿少卿

寇陽字體乾榆次人嘉靖己丑進士知廣平縣甚著循聲升  
禮部主客司主事歷浙江僉事陝西參議所至持廉秉公人  
靡敢以私干而商洛產金毫無所取焉尋爲江西按察使不  
阿嚴相以浙江右布政落職陽少好學雖生長閩閩有茹齋  
映雪之苦居家孝友足跡不至公門清風懿行至今稱述云  
唐頤陽曲人希介孫嘉靖乙未進士官至臨洮知府持已清  
謹居家儉約歷二千石而家業蕭然不干謁不語時政得失  
循循退讓林居四十年年八十五卒

李應時太原前衛人幼穎悟篤學強記畧年名藉諸生間登  
嘉靖壬子鄉試謁選授兵部司務絕苞苴請託同僚嚴重之  
俸滿量移南京戶部員外郎甫八月致仕囊橐垂竭不能治  
行李賴故人爲郡守貲以歸里頽垣破屋不蔽風雨薄田不

能供饘粥不爲苟得地方當道自公事外無私語工詩文博學廣稽卽天文地理星相醫卜無所不究而居已恂恂與人處無畧寡小大必以誠敬以孫成名貴贈通議大夫戶部右侍郎

李希洛字宗程陽曲人嘉靖癸丑進士倜儻有大略授昌黎知縣時關中地震民多被傷遂移知渭南掩骼埋胔招恤流亡民建祠祀之拜戶科給事中彈總督胡宗憲貪肆忤相嵩歸里事兄通判希濂愛敬純篤士民婚喪不能舉者傾貲賙貸歲旱捐廩煮粥濟活頗眾所著有益言錄政學訓言錄明儒要言

趙體敬太谷人嘉靖壬戌進士授行人兩使親藩餽遺悉卻升兵部主事歷員外郎中擢鳳陽知府持操冰蘖敷政惠和

兩課俱爲諸郡最遷四川右參政

李敏字融南榆次人登丁未李春芳榜進士選翰林院庶吉士授刑科給事中庚戌虜變保定楊中丞以援遲被逮敏力救之廷杖被謫後復升禮科給事中不從醢事行香又被杖累遷至順天府尹自陳歸里徜徉原澗別墅十餘年終尙書褚鈇撰墓志

褚鈇字民威榆次人嘉靖乙丑進士授河間縣知縣縣畿輔近地稱難治鈇蒞任詳而有體循聲冠三輔徵爲監察御史遇日食上疏陳六事出按陝西茶馬藩府欲得牧地爲湯沐邑力爭遏其請虜方受款而時掠番自利鈇曰番爲河西屏藩急必折入虜虜內狃中國外兼番人爲害必甚後皆如其言再按河南周趙二藩有醢縱爲民害者奏治不少貸督南

幾學政稱公明遷大理寺丞轉少卿擢右僉都御史巡撫河南疏免逋稅九萬有奇召入內臺佐院事遷大理寺卿再遷工部侍郎值興慈甯工庀材量費悉出手畫尋以勞邁疾請告歸病痊起原官改刑部侍郎中丞李材以言事忤旨再三執奏得釋遷右都御史兼戶部侍郎晉尙書領漕務兼撫江北淮水泛溢陵寢及漕將被患築周家橋塞黃垆口繕完歸仁故堤陵與漕兩無害加太子少保後兩宮三殿災陳時政急務語極凱切不報疏乞骸骨屢上始命馳驛歸卒年六十有八贈少保賜祭葬如例

吳夢麟字徵仲翼城人嘉靖壬午舉人初授禮部司務轉戶部郎中升鞏昌知府冰蘖自勵寬和不擾民甚德之所得俸祿悉贍宗族及友之貧者無私蓄焉升太僕寺卿行李蕭然

圖書數卷而已

康天爵臨汾人嘉靖癸未進士歷官陝西參議事母至孝居官情愼嘗監山東銀礦毫無所取及歸有武弁遠送密饋以金責卻之時稱廉直

王與齡字受甫鄉宦人

明史誤謂鄉舊志於汾州人物嘉靖錄史傳又採方志入吉州人物

八年與兄培齡同第進士授蘇州推官入爲戶部主事調吏部進員外郎受業崔銑友羅洪先唐順之趙時春鄒守益徐階二十一年遷文選郎中澄清銓敘所推薦皆廉靜老成大學士翟鑾爲禮部主事張惟一求吏部嚴嵩爲監生錢可教求東陽知縣偕主事周鈇等白之尙書許讚具疏以聞言平時請屬甚多臣等違抗積罪如山非聖明覆庇則二權奸主於中羣鷹犬和於外臣等不爲前選郎王嘉賓之斥得爲近

曰御史謝瑜之罷幸矣疏入鑾言惟一應遷嵩抵無致書事  
因言聖明獨斷而讚等妄意臣輩爲之借以修怨然讚柔良  
第受制所屬耳上方信嵩又見疏中引嘉賓瑜事遂切責讚  
除與齡名鉄等俱調外給事中周怡論之廷杖繫獄御史徐  
宗魯等亦以爲言皆奪俸自是諸司以與齡爲戒無復敢與  
嵩抗與齡旣罷錦衣遺偵其裝襖被外無長物稱歎而去里  
居角巾躬稼園郡人爲作平陽四賢詩美之四賢者尙書韓  
文陶揆張潤及與齡也閱二十餘年卒

劉廷臣號白石洪洞人通判榮子性沈毅體貌魁梧目炯炯  
如電嘉靖丁酉舉鄉試第一明年成進士授裕州知州時駕  
南狩裕州歲比不登或諷其少緩可規免廷臣擇土著諳事  
十數人指授規畫甫就緒駕至見其條理井井慰勞有加後



使者奉勅來賑又爲條陳便宜多所全活擢刑部員外遷郎中奉命錄畿輔囚得矜原者八百餘人出爲開封知府以嚴爲治強宗悍族胥斂迹遷辰沅兵備副使路出裕州百姓爭持酒獻之尋改天津大名河間兩地妖民將爲亂陰授將土方畧擒滅無遺後師尙詔亂河南移師討之盜平因晉其地參政未幾擢僉都御史巡撫宣府遇邊警督諸軍捍禦之以大捷聞加副都御史嘗以其暇編上谷須知上谷圖說南山圖考中間山川險阨土馬糧儲咸在以勞遽疾疏乞致仕歸承母歡攜友人登山臨水以自娛部使者過之謝弗與通卒時年五十一子應科舉人官知府應元進士官至參政應時別有傳

晉朝臣洪洞人嘉靖庚子舉人授和州知州升戶部員外郎

致仕進階奉政大夫孝友端方知和州廉明折奸惠愛在民  
趙中丞有守同金玉名擅江淮之稱祀名宦入司農督儲清  
源請卹解戶特報羨金張尙書旌曰廉吏歸里周戚黨之乏  
陳扛役之艱首倡塼城及建祖祠修邑志皆非一時之計厥  
功甚偉

王三接洪洞人嘉靖丁未進士授博興知縣遷甯國府同知  
丁內艱未任補充州府升甯夏僉事遼東參議泣任清慎撫  
民仁恕博興素號難治加意振刷豪右屏跡築隄防河水不  
爲患佐郡嚴明有聲督儲西夏才識優長處事明敏多所利  
賴焉

劉應時嘉靖丁未進士授戶部主事升山東副使四川參政  
改陝西副使居二年歸在海岱法紀嚴明寇盜潛蹤陝右備

築堡練兵功稱保障云

晉應槐字似齋洪洞人員外朝臣子嘉靖丙辰進士授內閣中書擢吏部主事遷文選司郎中掌銓政徐相國黃少宰爲其私人請峻拒之秩滿例舉一人自代司馬某以其子爲言弗應擢太常寺少卿會司馬晉冢宰謙前事借京察典謫運判遷廣平同知轉河南僉事礦賊起河北道勇士二十人佯爲賈客入賊壘縛其渠魁以出遷陝西固原副使靖甯告變將士請用兵不許用計散遣之艱歸起湖北參政刊屯約四章按侵奪者寘於法遷本省按察使景王府第燬於火府僚聚飲所致卒正其罪尙書何某爲之請不聽遷右布政使當大比江陵相介學使者屬其子笑卻之泣任四月晉右僉都御史巡撫甯夏下令市馬不得踰額靈州守將爲凶卒所殺

擒治如律後爲湖北理官誣奏巡按覈實疏其枉以原品調南都因謝政歸卜築城北之北溪日手黃庭一編凡二十五年卒時年七十五子承寵進士承命承忠孫淑程淑文淑周俱舉人

李曰強曲沃人家貧力學天性孝友弱冠領辛酉解額乙丑成進士授宜陽知縣裁革冗費暨歲供良馬墾山地以免差役召貧民以給牛種政簡刑清甫二載薦剡者七次徵爲南京禮科給事中時穆宗取大倉銀上疏直諫累升貴州左參政屢疏乞歸杜門課子自奉儉約接人和易歲饑出粟振濟邑人德之

趙廷伋岳陽人嘉靖間以貢初任經歷終於山東德府長史所至多惠政上下懷服及歸睦鄉惠族周貧恤患設醫藥立

義冢悉殫力爲之

何尙德字汝修猗氏人天姿穎異於墳典多所授閱德器純粹望之如卿雲和璧舉嘉靖壬午鄉試授興安州知州蒞任四載省刑薄斂以清廉著行之日庫有餘贖七白金毫不爲染尤人所難升開封同知子弟甲科一時稱盛

杜漸字于達猗氏人嘗從學於宋震博通經書子史嘉靖壬午舉人任齊東知縣調掖縣艱歸補商城肅宗南巡中貴索供億不遂中傷落職商民扶老攜幼犯蹕請留不許立祠祀焉卒後十餘年汝南喻按鹽河東下車首謂鄉士大夫曰吾素不識杜君每見商民談及未嘗不流涕因登循良坊於門場博字惟約蒲州人父贈御史終四川僉事博舉嘉靖八年進士除塾屋知縣調長安徵爲兵部武庫主事歷職方郎中

大學士翟鑾巡九邊以博自隨所過山川形勢士卒多寡強弱皆疏記之至肅州屬番數百遮道要賞鑾慮來者益衆不能給博請鑾盛儀衛集諸番轅門外數以天子宰相至不悉衆遠迎將縛以屬吏諸番羅拜請罪乃稍賚其先至者餘皆懼不復來鑾大喜還薦博可屬大事尙書張瓚一切倚辦博上或中夜降手詔隨事條答悉稱旨毛伯溫代瓚博當遷特奏留之已遷山東提學副使轉督糧參政二十五年超拜右僉都御史巡撫甘肅大興屯利請募民墾田永免科修築肅州榆樹泉甘州平川境外大蘆泉諸地墩臺鑿龍首諸渠進右副都御史母憂歸先是仇鸞鎮甘肅博常發其貪罔三十事及鸞拜大將軍數毀之不聽服闋召拜兵部右侍郎轉左經畧薊州保定潮河川水湍悍不可城博緣水勢建石墩置

戍守還督九門尋遷總督薊遼保定軍務三十三年秋把都兒及打來孫十餘萬騎入薊鎮攻牆上數遣騎偵博博環甲宿古北口城上督總兵官周益昌等力禦上大喜馳賜緋豸衣犒軍萬金寇攻晝夜不得入乃并攻孤山口登牆官軍斷一人腕乃退屯虎頭山博募死士夜以火驚其營寇擾亂比明悉去進右都御史蔭子錦衣千戶明年復入擊卻之擢兵部尙書加太子少保嚴嵩父子招權利一切格不行會父憂去俄起兵部尙書代許論博疏辭而大同右衛圍急改總督宣大山西軍務博墨線馳出關寇引去右衛圍六月守將王德戰亡芻粟且盡死守無二心博厚加褒卹奏行善後十事給事中張學顏請留博鎮撫奏蠲被寇租因僉其丁壯爲義勇造偏箱車百輛有警則右衛車東左衛車西使相聲援又

以大同牆圯急繕治塞銀釵驛馬諸嶺以絕窺紫荆路備居庸南山以絕窺天壽路修陽方神池諸牆塹以絕入山西路乃於大同牛心山諸地築堡九墩臺九十二接左衛高山站以達鎮城濬大濠二各十八里小濠六十有四五旬訖功賜勅獎賚上數欲召還嵩雅不喜博請俟秋防畢徐議之秋防訖給事中王文炳請召還上以邊防非博不可命加太子太保留鎮如故呼素把伶及叛人了都記等數寇邊先後計擒之又數出奇兵襲寇寇稍徙帳因議築故總督翁萬達所創邊牆招還民爲寇掠者六千百餘人又請通宣大荒田水利薄其租報可移薊遼總督召還加少保每先事爲防上眷倚若左右手王直求封爵持不可久之改吏部尙書隆慶初請錄建言諸臣死者皆贈卹連疏乞休並慰留進少傅兼太子



太傅時將游南海子率同列諫御史詹仰庇以直言罷力爭之屯鹽都御史龐尙鵬被論議留忤旨謝病歸尙書劉體乾等交章乞留不聽太學士高拱薦傅堪本兵詔以吏部尙書理兵部事傅魁梧豐碩臨事安閒有識量自翟鑾幕府知名出入中外四十餘年始終以兵事著六年改吏部進少師兼太子太師明年秋疾作三疏乞致仕歸逾年卒贈太傅謚襄毅

王光字德潛臨晉人嘉靖乙未進士性孝友母目盲禱於天母目復明厯官戶部郎中督糧甘肅嚴禁奸蠹士貧未娶者助婚資時蘭泉劉驛丞賣女妓家爲贖歸之敵騎入疆授將土方畧以捷聞升僉事巡隴右輯民撫番豪黠斂跡民立生祠

王輪蒲州人嘉靖戊戌進士生有至性祖母嚴苦志守節業得旨旌其門與人言淚猶潸潸下居鄉以任卹著通籍數十年所得俸錢悉以周族黨起庶僚四歷巡撫保釐之績爲功於疆索甚大在薊鎮時嘗出巡塞外與夫偶蹶撲地墮輪水中眾懼失色輪不之罪人皆服其雅量卒後追敘邊功賜祭葬有加

楊時芳字道亨猗氏人四歲能辨四聲十三歲入庠弱冠舉庚子鄉試授寶坻知縣調正甯升慶陽府通判督餉甯夏舉綱振維不緣俗吏文法中貴人捕銀魚止傳舍衙不刺謁因擠排乃曰以此受污芳香多矣或言其城荒涼曰萬井鹹水一階沙葱正吾着力處也及歸敝衣羸馬恬淡自處弟聯芳乙卯經魁早卒人嘆爲雙珠失一子璠甲寅貢歷任教授

何尙賢猗氏人尙德弟嘉靖甲辰進士由南郎中出爲延安同知禦邊有功升漢中知府擒劇賊何勉致仕歸動履飭謹非弔問未嘗出閭稱有道君子卒鄉人私謚曰貞定子東麟貢士善詩文東鳳丙子經魁

王崇古字學甫蒲州人嘉靖二十年進士除刑部主事由郎中歷知安慶汝甯還常鎮兵備副使擊倭夏港追殲之靖江從巡撫曹邦輔戰許墅已偕俞大猷追倭出海累進陝西按察使河南右布政使四十三年擢右僉都御史巡撫甯夏崇古喜譚兵具知諸邊阨塞身歷行陣修戰守納降附數出兵搗巢寇屢殘他鎮甯夏獨完陞慶初加右副都御史冬進兵部右侍郎兼右僉都御史總督陝西延甯甘肅軍務崇古奏給四鎮旗牌撫臣得用軍法督戰又指畫地圖分授諸大將

趙苛雷龍等數有功四年正月改總督宣大山西軍務崇古  
禁邊卒闌出而縱其素通寇者深入爲間又檄勞番漢陷寇  
軍民率眾降及自拔者悉存撫之歸者接踵西番瓦剌黃毛  
諸種一歲中降者踰二千人冬十月俺答孫把漢那吉率妻  
子十餘人來歸巡撫方逢時以告崇古念因此制俺答則趙  
全等可除也留之大同慰藉甚至偕逢時疏於朝奏至朝議  
紛然大學士高拱張居正力主崇古議詔授把漢指揮使賜  
緋衣一襲俺答方掠番間而急歸調辛愛兵分道入索把漢  
甚急崇古偕逢時遣百戶鮑崇德入其營俺答盛氣待之崇  
德曰今朝廷待而孫甚厚稱兵是速其死也俺答聞言心動  
使使謂之崇古令把漢緋袍金帶見使者掩答喜過望崇德  
因說之曰趙全等旦至把漢夕返俺答大喜屏人語曰是天

遣之合也幸封我爲王永長北方諸部孰敢爲患他日我孫  
當襲封彼受厚恩豈敢貢耶遂遣使與崇德俱來又爲辛愛  
求官并請互市崇古以聞悉報可俺答遂縛全等十餘人以  
獻崇古亦遣使送把漢歸上祭告郊廟磔全等於市加崇古  
太子少保兵部尙書總督如故疏請通貢市朝議復譁崇古  
復疏力爭之因條封貢八事以上詔下廷議會御經筵閣臣  
李春芳等面請外示羈縻內修守備乃詔封俺答順義王昆  
都力辛愛等皆授官封把漢昭勇將軍指揮使如故俺答率  
諸部受詔甚恭使使貢馬執超全餘黨以獻上嘉其誠賜金  
幣又給玉印加撫賞惟貢使不聽入京河套吉能亦如約請  
命陝西總督王之誥議令吉能一二年不犯方許封貢崇古  
復疏剖明之亦授都督同知崇古乃廣召商販聽令貿易布

帛菽粟皮革遠自江淮湖廣輻輳塞下因收其稅以充犒賞  
其大小部長則官給金緡歲市馬各有數崇古仍歲詣宏賜  
堡宣諭威德諸部羅拜無敢譁自是邊境休息東起延永西  
抵嘉峪七鎮數千里軍民樂業歲省兵費什三詔進太子太  
保萬厯初詔理戎政加少保遷刑部尚書改兵部致仕歸卒  
愛瘡力克相繼襲封十五年詔以崇古竭忠首事三封告成  
廕一子世錦衣千戶有司以禮存問仅二年卒贈太保謚襄  
毅崇古身厯七鎮勳著華裔封貢初廷議紛呶幸明季牽制  
文法之習是時尚未熾僅獲成功順義歸款二十年崇古乃  
沒總督梅友松撫馭夫宜西邊始擾而禍已紓於嘉靖時至  
宣大則歸款迄明季不變子謙萬厯五年進士官工部主事  
權稅杭州羅本營兵變脅執巡撫吳善言謙馳諭之乃解終

太僕少卿孫之楨以蔭累官太子太保左都督掌錦衣衛事  
凡十有七年之采萬歷二十六年進士官兵部右侍郎陝西  
三邊總督

傅希孟字仲道蒲州人嘉靖丙午舉人任同州知州性簡素  
質直去家不兩舍而絕無行遊者奉檄度田履畝按覈不攜  
庖饌冰檠之操三年如一日遷漢中府同知又遷順天府治  
中歷姚安知府卒之日家四壁立

衛鈞臨晉人嘉靖己酉進士授任縣知縣潔已愛民卒於官  
吏民哭弔如喪私親及歸送越他境有望塵墮淚者入名宦  
兄鈿辛卯舉人由新城知縣陞昌平知州耿介廉潔時陶嚴  
煽毒鈿執法不避權勢卒爲所搆弟鏐辛酉舉人任扶風知  
縣有惠政補 鄉實心愛民招撫流移復業者甚眾至定徵

規緩期限禁侵漁善政尤多後免歸百姓立德政碑

張四維字子維蒲州人嘉靖三十二年進士改庶吉士授編修隆慶初進右中允直經筵尋遷左諭德四維嫻文辭儻儻有才智明習時事楊博王崇古久歷邊陲善談兵四維博同里而崇古姊子也以故亦習知邊務高拱深器之拱掌吏部超擢翰林學士甫兩月拜吏部左侍郎俺答封貢議起朝右持不決四維爲交關於拱款事遂成拱益才四維進左侍郎請告歸尋召充東宮侍班神宗初張居正當國復移疾歸萬曆二年復召掌詹事府三年三月居正請增置閣臣引薦四維遂以禮部尚書兼東閣大學士入贊機務居正卒四維爲首輔累加至少師吏部尚書中極殿大學士初四維爲次輔凡惡居正者擬旨不盡如居正意旣得政知中外積苦居正



欲大收人心會皇子生頒詔天下疏言今法紀修明海宇甯  
謐足稱治平而文武諸臣不達朝廷勵精本意務爲促急煩  
碎致徵斂無藝政令乖舛中外聳然喪其樂生之心誠宜及  
此大慶蕩滌煩苛宏敷惠澤俾四海蒸黎咸戴帝德此固人  
心培國脈之要術也上嘉納之自是朝政稍變言路亦獲發  
舒言事司禮馮保欲因兩宮徽號封已爲伯四維力持之保  
黨謂四維與吏部尙書王國光同鄉相厚可搆也御史曹一  
夔劾國光拔四維中表弟王謙爲吏部主事上慰留四維御  
史張問達復劾之上譴問達於外已而四維門生李植輩發  
保奸狀保及其黨皆逐朝事一大變四維謂除惡務本本旣  
除餘黨可畧請上與更始而汲引海內正人爲居正所沈抑  
者雖未卽盡登用然力反前事時望屬之雲南貢金後期欲

罪守土官又詔取雲南舊貯礦銀二十萬皆諫止之詔江西  
陶資器十萬多奇巧難成四維亦力諫尋以父喪歸賜資優  
渥亞居正焉服將闋卒贈太師謚文毅四維著條麓堂集子  
泰徵甲徵胥舉進士泰徵累官湖廣參政甲徵工部郎中  
任汝亮猗氏人嘉靖壬戌進士授戶部主事監檀城餉却羨  
金筦大倉查盤數不相符詔逮獄汝亮抗疏廷辨中貴索賂  
汝亮奮言曰天朝法紀有賂免耶中貴駭散尋釋改兵部歷  
任泉州知府時亢旱郡人所於九鯉湖神夢語曰太守雨何  
不悟汝亮下車雨卽如注泉州山湧一泉能愈人疾石上題  
字云巨雷關石神泉湧出見者神清食之無疾以傳以誦良  
二千石汝亮左遷興國泉湮而字亦滅卒於官不能敘同官  
朱正色助治喪具以歸後人有遇汝亮於武當者始終以奇

著云

張問明猗氏人十歲以神童補弟子員嘉靖壬戌進士授光山知縣縣宋元交戍地習爲盜藪以計除之拜御史雄才敏政風動朝野閱視湖川雲貴世廟曰西南萬里須此人方稱旨按三吳江右世族淺毒法無少遜忤政府改南戶部歷吏部出河間民爭賀曰此舊御史不徇勢而惠我者以疾歸處鄉慷慨有大節一時人士無不想慕其丰采其在廷諸疏草輒自削去今散落不存

楊俊民字伯章蒲州人博子也嘉靖四十一年進士除戶部主事歷禮部郎中隆慶初遷河南提學副使高拱甥劉生得罪杖黜之拱兄僉都御史捷沒有司請祠弗許尋轉右參政萬曆初入爲太僕少卿博致政侍歸起故官累遷兵部左侍

郎署部事時議撙力克嗣封俊民言款未可遽罷惟外勒西部使盡還巢申定市額使無濫索而已議遂定進戶部尙書總督倉場十九年還理部事河南大饑請發銀米各數十萬以稽緩自劾求罷疏六上不允小人競請開礦爭不得滿三考累加太子太保卒官贈少保後贈少傅兼太子太傅

賈仁元字西池萬泉人嘉靖壬戌進士初授厯城知縣入爲兵部主事改戶部補刑部遷戶部員外郎厯郎中出知保定府遷山東臨清兵備副使轉陝西西涼左參政以邊功遷山東按察右布政使特擢陝西延綏巡撫都御史以軍功蔭子世襲錦衣衛千戶並復其族人爲兵部左侍郎協理京營戎政充經筵官三疏所致仕加兵部尙書馳驛回籍食俸如在官時仁元自釋褐游登樞府胥以清操著練兵足餉尤加意

文敷在延綏嘗集寮屬詣鄉約所講解忠孝節義事卒後遣  
官諭祭葬給墓田七十畝祀名宦

韓楫蒲州人嘉靖乙丑進士選翰林院庶吉士遷刑科給事  
中忠直敢言穆宗登極前後三上劄極陳君道在正始元輔  
徐階持其疏稱爲中興第一又以薛文清瑄學術醇正疏請  
從祀後累官至通政使

楊相蒲州人嘉靖乙丑進士授成安知縣擢御史按陝西茶  
馬繼按河南巡京營心體洞豁遇事剛果考成憲酌時宜疏  
言茶馬四事理財三事皆闕大體至論成國不當封王膠河  
不當動眾尤爲時所稱誦轉山東副使湖廣參政以疾告歸  
姪淳同科舉人子暄萬曆丙子舉人

董汝漢字昭夫萬泉人嘉靖乙丑進士授咸甯知縣陞兵部

武選司主事絕苞苴門無私謁遷甯夏兵備副使順義王將東歸尙貧固未發汝漢直言撫之咸服而去轉關南參政亂民聞風解散晉左右布政致政歸居鄉二十年加惠閭黨待以舉火者百餘家子璜貢監振貧卹乏利賴一方稱世德焉郭昂猗氏人嘉靖間監生任興平縣丞多惠政民歷久不忘祀名宦子鎰字子京由例貢復仕興平父子相繼秦民稱之子銓字衡山諸生博學端方祀鄉賢

趙希夔字一卿潞州人父秉中陝州同知博雅有時名希夔嘉靖乙未進士任安州知州厯官河南左布政使以藩親不得爲京官加食正一品俸且開散官蔭子之例方爲州時僅弱冠嘗督隄功水大至眾皆驚散乃獨立衝所眾還競築隄得不壞時世廟南巡所經多獲罪安肅知縣逃當道以希夔

攝之設黃布爲行宮供億無異物上喜欲以爲巡撫地方官  
不拜時值獻后梓宮南下中人謗喪郡縣苦之臨清知州亦  
逃當道又以攝州據理應酬中人悅服銅仁小平茶苗叛官  
軍征之不服希夔時在貴州以他道署事撫按以兵事屬焉  
賊退入深箐兵不得進乃爲礮礮望煙飛擊賊逾深遁遂伐  
木開道入其穴授苗豪安天朝以方畧使立功贖罪苗遂平  
拓地二百里以和馭下有趙佛之稱致仕歸絕請謁勸化鄉  
人隨分歸善壽八十七而終子三子實儀賓于敏官至知府  
于樸貢士

栗永祿字士學潞州人嘉靖庚子領解甲辰成進士以宗親  
授壽州知州故有古芍陂塘久廢力爲開濬遷蘇州府同  
知歷陝西僉事副使浙江參政調河南參議尋遷直隸副使

備兵昌平獲謀者得入寇奸謀預爲備及至督將士力戰大創之以功受上賞調陝西參議分守河西兼理靈州鹽課下車問民疾苦不數月底政一新徵爲光祿卿轉順天府府尹穆廟歎其有邊才越數日昌平警至遂以副都御史出鎮其地威望所震咸逡巡引去改河南巡撫入爲兵部侍郎督南京糧儲罷歸復起兵部侍郎巡撫甘肅尋致仕歸卒賜祭葬如例贈脩有加兄永爵同登庚子榜累官磁州知州

李之茂字汝培號七泉屯留人嘉靖庚子舉人爲山東滋陽令嘗夕按圖扉有童子而析楊泣者則其祖負官金而三世逮者也之茂惻然以百金代償釋之河決徐沛間之茂督治夏村隄有功如俸一級尋拜南臺監察御史巡視鳳陽倉魏國子爭爵事連勳貴命南臺議法之茂挺身斷曲直襲乃定



因以骨鯁忤勢要且抗疏論相國攝銓憲非高皇帝法遂出補陝西按察司僉事丁內艱免喪起補河南分巡汝洛間按貪暴以法盧氏礦盜倡亂設方畧擒之忌者以蜚語上聞下所司考驗事白補四川治兵敘瀘時都蠻新平之茂招掠反側修戒備將吏偷安者嚴罰之有詔省官以敘瀘事兼領川南當徙職會妻喪遂歸不復起

任環字應乾長治人嘉靖二十三年進士歷知黃平沙河滑縣並有能名遷蘇州同知倭患起獨以身任之三十一閏三月禦賊寶山洋小校張治戰死環奮前搏賊相持數日賊遁尋犯太倉環馳赴之短兵接身被三創宰夫捍環出死之賊亦引去已而復至裏瘡出海擊之濤怒作意氣彌厲竟敗賊俘斬百餘復連戰陰沙保山南沙皆捷擢按察僉事整飭

蘇松兵備倭歸惟南沙三百人舟壞不能去與總兵湯克寬  
列兵守之數月賊大至踰年犯蘇州城閉鄉民繞城號環盡  
納之全活數萬計率副將解明道擊退賊論前後功進右參  
政賊掠常熟率知縣王鈺破其巢焚舟二十七賊尋掠陸涇  
壩都督周于德敗環偕總兵俞大猷擊敗之焚舟三十餘賊  
犯吳江又擊敗之驚脰湖頃賊於三板沙奪舟出海襲敗之  
馬蹟山別部屯嘉定火焚之盡死論功蔭一子副千戶母憂  
奪哀賊屯新場環與都司李經率永順保靖兵攻之士舍彭  
翹死停俸賊平乞終制許之踰二年卒年四十給事中徐師  
曾頌其功贈光祿卿再蔭一子副千戶建祠蘇州春秋致祭  
環嘗與士卒同寢食所得賜予悉分給事急終夜露宿或數  
日絕餐書姓名於體曰戰死分也先人遺體他日或收葬將

士皆感激故所向有功

李尙智字子愚屯留人嘉靖甲辰進士知直隸清苑縣擢監察御史轉山東青州知府直隸密雲副使補四川參政山東按察使晉右僉都御史巡撫延綏調保定尙智蘊經世畧居官以廉潔爲先而出以公愼自郡縣至開府所至皆有惠政在延綏控制五路警伏諸番尤稱一時屏翰致政後家無長物布衣蔬食稱貸自給怡如也當道數十薦皆不起世以清望推之

楊世卿長子人嘉靖丙午舉人授沙河知縣歷知州同知陞南京戶部員外郎中致仕所至有政績以理學名一時科貢多出其門

李尙賓潞州人嘉靖壬子舉人知河南輝縣補淇縣秩滿遷

裕州知州淇人走闕下乞復任詔以知州留知淇縣尋爲直指使者所擠勅歸尙實有異才詞賦文章胥自出機軸有奇氣性狷介眾謂恃才軋人故爲所忌既歸貧益甚一日求妻鳳釵易米供晨爨妻曰君以貪掛御史白簡乃無米炊耶尙實曰謀米及婦使一釵不保吾不貪誰貪者聞者啞然子夢熊舉人滄州知州孫專業舉人柏鄉知縣三世胥稱清白吏鮑承蔭字子傳長治人父龍戊戌進士知崑山縣禦倭寇有功承蔭登丙辰進士授中書舍人改監察御史時西山僧徒作佛事特疏禁止三巡直省俱著風裁出爲河南副使山東參政轉河南按察使歷左右布政使卒

邵光先字子孝長治人嘉靖己未進士初知上海縣徵爲監察御史遷大理寺丞晉少卿擢右僉都御史歷右副都御史

巡撫延綬改左副都御史協理院事甫一年復出撫薊遼保定兼理邊務晉兵部右侍郎轉左總督三邊軍務艱歸補原官晉兵部尚書加太子少保光先嚴重有威官御史時發憲長姦賊及諸豪宗橫肆狀風采凜然在兵部邊人求內附眾莫敢汎光先謂外示羈縻內修武備斯可以制其死命議定朝野倚賴之襟度冲穆無城府生平服官半在戎馬中間父病革一慟而絕訃門贈太子太保予祭四壇命行人董葬事視常典有加

馬宜春長子人廉介博學中辛酉鄉試時新中舉人里甲派百金爲賀宜春固辭不受遂革其弊至今遵之後授鄆縣知縣不樂仕進遂

暴孟奇字玉溪，屯留人嘉靖乙丑進士任戶部主事改御史

歷衛輝府知府陝西臨鞏兵備副使性直懇練達剛果蘭大猾十許人冒餉金鉅萬比事發耗蕩無寸絲孟奇以首惡正憲典代償贖銀二千金凡屬牽引俱爲讞釋往者實粟塞下粟貴而賤人商戒不來孟奇言於督撫平其人商不受因而倉廩充盈北城臨河易圯大爲贅砌州民賴之

方金石州人爲兵科給事中嘉靖九年上疏言陛下臨御之初盡斥法王國師佛子近又斥姚廣孝配享臣每歎大聖人作爲千古莫及乃有眞人邵元節者誤蒙殊恩爲聖德累夫元節一道流耳有勞優以金帛足矣乃加崇秩復賜其師李得晟贈祭廣孝不可配享於太廟則二人益不可拜寵於聖朝望創元節眞人號并奪得晟恩卹庶異端闢正道昌上方欲受長生術立下詔獄拷掠終以其言直釋之尋借御史唐

愈賢襄御用監財物劾奉御李興等侵蝕狀寘諸獄後累官  
蘇州兵備副使卒

劉尙義汾州人嘉靖乙未進士由行人選御史棱棱有威望  
尋調秦州判官改朝邑知縣遷松江同知督糧餉不私其贏  
署府事革堂食費吏屬畏其介升南京刑部郎中出補四川  
僉事備兵西蜀兼督松茂邊餉蜀人苦它運尙義設法收給  
軍民兩便作八頌以詠之轉陝西參議河南副使卒於官家  
無餘蓄著柏山集四卷

張玘石州人嘉靖乙未進士授清豐縣知縣入爲兵部主事  
洊厯郎中出爲永平府知府先是夢二朱衣人遣墨二笏至  
是謁夷齊廟所見宛如夢泣任三年擢按察司使以去行囊  
蕭然論者以爲有孤竹遺風晉右僉都御史巡撫順天屢奏

首功尋謫布政司參議復入爲大理寺少卿遷順天府府尹  
轉南京戶部右侍郎召爲兵部右侍郎中途疾作至延津卒  
縣令發其行裝止俸金一十七兩訃聞賜祭葬如例孫維以  
蔭仕至武定府知府

霍冀字堯封孝義人嘉靖甲辰進士初授永平府推官以績  
最拜御史清軍浙江巡按河南破妖賊師尙詔巡撫甯夏戎  
事甚飭上嘉之資以金綺移鎮保定畿右歲祲嚴武備發倉  
廩民賴全活薊昌宣大以缺餉告命徧歷疆場盡得耗蠹侵  
冒之實因條上恤軍通商轉輸積貯四事總督三邊軍務厚  
恤死事汰諸將不職者募丁壯激忠義修戰守具軍容一新  
隆慶丁卯敵犯嵐汾石州軍書告急晉兵部尙書冀料天下  
戎馬強弱邊塞要害及諸將帥材勇高下悉經畧劑量之宜



籍田建儲大閱皆蒙恩錫以講憲臣功罪及京營事宜兩忤  
輔臣乞歸年六十卒賜卹典如例

王緝汾陽人繹子嘉靖乙未進士授吉安推官以母老迎養  
不便疏請就近改助教歷升職方司郎中辛未聘禮闈校士  
所收多碩彥繹太僕卿旋升僉都御史巡撫貴州苗民悉感  
化歸附恐後欽賜金幣令紀錄進副都御史巡撫南贛後升  
戶部侍郎敷歷中外三十餘年勛績爛然所著有防邊紀畧  
等書

張好古陽城人嘉靖癸未進士元城知縣時皇親怙勢擅作  
威福好古以法繩之詔繫獄謫靈臺典史復鹽城知縣升刑  
部主事先是陽邑均徭溢額大爲民累好古奏豁民甚德之  
轉四川僉事

丁謹澤州人嘉靖丙戌進士觀政戶部勞軍固原人服其清介授宜興知縣請免額外之徵濬淤沒之田民多利賴建祠祀之

鍾鑑澤州人嘉靖己丑進士知巢縣調獻縣補洛陽歷河南知府陝西副使陞參政時關隴大饑全活以億萬計方艾引疾乞休讀書教子士論高之所著有禮經主意

孟霖澤州人嘉靖己丑進士任陝西督糧道明敏廉介剛柔交濟督儲有方每師出糧餉充裕臺體嚴肅放衙後優悠詩翰蕭然事外

李牙陽城人嘉靖辛丑進士任邵陽知縣民狡悍多負公租牙嚴懾而寬恤之俗丕變有橫豪害人擒治如法邑有牙除虎害之謠累陞湖廣按察肅憲度恤刑獄平叛逆師尙詔以

功歷河南山東布政平賦節用賑飢溉田善績懋著泰山香  
縉久爲諸司折俸宿弊也牙令貯府庫以待公用檢通省郡  
邑積贏萬金以實內帑薦章數十上兩考左轄績以覃恩階  
正二品加從一品俸疏歸年七十一卒子可久亦登進士歷  
官四川僉事

王國光字汝觀陽城人嘉靖二十三年進士授吳江知縣鄰  
邑疑獄來質訊輒得情調儀封擢兵部主事改吏部歷文選  
郎中屢遷順天府尹戶部右侍郎總督倉場謝病去隆慶四  
年起刑部左侍郎拜南京刑部尙書未上改戶部尙書再督  
倉場神宗初還理部事時簿牒繁冗州縣有繕書輸解交納  
諸費疏請裁併去繁文十三四胥稱簡便請行天下撫按官  
督所司具報出入存留逋負之數戶部得通融會計以其餘

濟邊又以京軍支糧通判侯伺甚艱請遣部郎一人司之名  
坐糧廳驗發無過三日諸軍便之天下錢穀散隸諸司請歸  
併責成畿輔府州縣歸福建司南畿歸四川司鹽課歸山東  
司關稅歸貴州司淮徐臨德諸倉歸雲南司御馬象房及二  
十四馬房芻料歸廣西司遂爲定制三年京察乞罷特留之  
明年復固請詔乘傳歸瀕行以所輯條例名萬厯會計錄上  
之上令戶部訂正及書成詔褒諭焉五年冬起吏部尙書陳  
采實政別繁簡責令守恤卑官罷加納數事皆允行八年外  
察請毋限日期詔許之且命註誤者聽從公辨雪尋加太子  
太保國光有才智初掌邦計多所建白及是張居正枋政居  
正卒閒住已念其勞命復官致仕

馮時亨陵川人嘉靖丙午舉人由濟南府判擢陝西金州知

州時巨寇何勉嘯聚時亨給軍餉多所贊畫清廉自勵德政民思

張昇陽城人嘉靖庚戌進士知清苑縣多惠政擢戶部主事調兵部員外郎中出爲衛輝知府衛故多大俠昇按以法境內肅然郡資百泉灌田部使藉口漕運厲其禁昇抗言非便禁遂弛民不苦旱擢陝西副使改大名轉河南布政尋告歸性喜施與丙戌大疫延醫施藥發粟賑饑與鄉人處溫溫然若不知有官者卒年八十七孫慎言爲吏部尙書

蔣應奎大同人嘉靖丙戌進士授工部都水司主事治河呂梁遷營繕司郎中董建兩宮功成超拜太僕寺少卿遷應天府府尹以嚴爲治勦戚中有橫肆者悉裁以法捐金修學宮墾秣陵荒田千餘頃擢副都御史巡撫遼東甯遠開原一帶

壁壘維新入爲戶部侍郎改兵部兼僉都御史協理戎政應奎性恬淡爲諸生時嘗鬻衣養父母旣貴益堅素節卒之日喪幾弗克舉後贈兵部尙書

溫景葵字汝陽大同人嘉靖戊子舉人令長山陞御史守蘇州竝有治績庚申邊事孔棘兵道初設乃自霸州道移任永平四年創制運籌詳審精密如穀賤傷農立爲糴貯法因軍餉對支掠害商人立爲入倉法因將士重冒行糧濫費立爲稽塗法因後府催徭殘阨衛職疏準爲徑解惜薪司法修建昌營石門寨半壁山等城爲邊疆保障處置有方財不費而民不擾選士入孤山書院延師豐原嚴程課如親子弟科甲多出其門特擢都御史巡撫順天三載告病歸

郭石山陰人嘉靖甲午舉人以母老就選授滕縣知縣墾荒

田治兼并寬徭役捐俸構橋民德之名曰郭公橋發奸摘伏  
奸猾不敢欺訓課諸生周其貧乏戒其跡弛士皆以行誼相  
勉辛酉分校所錄皆知名士陞戶部主事滕民遮留盈塗建  
祠祀之累官整飭延綏道駐榆林謹烽燧嚴斥堠增置城堡  
練習士卒會敵大舉鼓舞將士躬臨矢石三入三敗之俘馘  
以百數丁艱歸補山東按察司僉事尋致仕

郭民敬山陰人嘉靖丁未進士山東壽光知縣治行濟南第  
一徵御史巡按南直奏蠲租賦民賴蘇息復按四川墨吏望  
風解綬去

馬豸大同人嘉靖壬子舉人文章行誼爲士林望初守蘇州  
有惠政邊事孔棘豸督民兵以計拒之遷鎮江府同知防江  
練舟師盜賊屏迹署丹陽諸廢事興開馬嘶港爲一邑永利

擢戶部員外尋升潁州兵備僉事潁多盜難治牙多方擒之民賴以安泗水衝齧貽陵寢患牙躬臨其地親督料理隄得永久以憂歸哀毀得疾行至廣陵卒

賈應元字德芳大同人嘉靖乙丑進士授厯城知縣縣近郭多汙萊爲開田北山下引湖水爲渠教以灌溉又開東山險路便車馬往來三年奏績第一以與撫軍忤僅遷南京刑部主事厯戶部員外遷兵部郎中出爲河南府知府擒妖民許天官及嵩山礦徒首惡郡內晏然遷四川分巡副使僚人倡逆募健兒焚其巢復詳爲條教導以禮義僚人畏服移陝西副使備兵延綏葺神木鎮羌諸城堡墾永濟荒田調湖廣長沙兵備遷陝西苑馬少卿值歲饑馬斃牧卒貧不能償部使者嚴督之與之忤以延綏不任職勒令致仕卒之日圖書數



卷蕭然如書生

薛綸字汝爲號幼泉其先興化人從戎至天城遂家焉綸登嘉靖戊辰進士授長安令蘇民力清土田禁狡民投匿勢豪伸理張良弼等寃擢兵部武選主事條上制虜安邊十數事出爲開封守彈壓強藩摧抑豪右擢陝西憲副治兵定邊當市羣虜索賞而課綸叱之無敢譁者以蜚謗罷官歸卒於家

視長安名宦

李瑾右玉人勇而多謀嘉靖中爲中路參將敵人犯西路馳兵往救或以非汛地沮之瑾曰比肩事主何分彼此旣至奮勇力戰殺獲無算後以總兵鎮大同操行清潔士卒中有得首功者親爲露布上其事或戰死設壇親祭之傷者亦親傅藥而於追殺失期及烽堠失警者則用法不少貸以故廢將

朱振得陰搆其間叛卒王福勝等遂於夜半聚眾焚總兵府  
瑾聞變持弓矢登門射之至天明矢盡知不免因解冑投地  
曰我大將詎可死賊手遂仗刀自殺振後爲總督劉源清所  
誅福勝等亦皆伏辜

劉漢平魯衛人嘉靖三十九年春總兵大同右衛邊外有地  
曰豐州崇山環合水草豐美大同人趙全以妖術謀不軌事  
覺懼誅與其黨李自馨劉四兒邱富趙龍呂老十猛谷王馬  
西川周元張彥文等投俺答割豐州一區處之爲城郭宮室  
開良田數千頃接東勝川號曰板升板升者華言城也全等  
勾引入寇所擄掠華人及叛出者俱聚板升教之製鈎竿攻  
城具時俺答引眾西掠閱二年留千騎守老弱夏涉大青山  
口外避暑惟全等不從漢與巡撫李文進密謀部分參將王

孟夏麻祿等五十三人率銳卒三千人馳進漢與趙苛以重兵分三哨營於玉林川隘爲後繼孟夏等羸糧疾驅昧爽鼓譟奮斬八十餘人生擒七十二人焚其宮室餘眾奔匿趙全匿墩上幾獲之俄而戎騎大至我兵引退且前且却分哨迭還與大兵合凡五日捷聞上大悅亟加陞賞有差

潘高甯化人弱冠登嘉靖壬辰進士偕名賢講道修德視章句不屑也屢遷大理寺正獄無遁情朝多美譽以忤時宰外轉陝西參議釋冤均賦懲貪戢強未幾罷歸後持節蒞晉者交章薦卒不果用

張鵬字鳴南沁州人嘉靖丙戌進士授河南府推官明刑愼獄甫二載撫按交薦者七父卒官所無以爲斂知府范代備喪具服除補衛府八閱月以薦拜江西道監察御史上經略

七邊封事嘉納之出按甘肅劾將劉文等匿賊不聞罪鑿鞏  
昌井數十人食其利復按山東建湖南書院於會城以課士  
立石泰岳禁捨身投崖之陋墾膠莒荒田數百頃聖母梓宮  
南祔上疏力言復寓書當路申其指又以其劾修葺沁城後  
敵入境桑梓獲全轉大理事右丞持正無所迴避甫一年疾  
作乞歸卒於家所著有東巡集諫草及遺文八卷

唐寬字栗夫平定人嘉靖壬辰進士授永平府推官折獄能  
得情人稱神君入爲刑部主事奉命恤刑陝西歷員外郎中  
出知河南懷慶府鄭府官校暴橫爲民害痛治之不貸遷陝  
西副使備兵肅州卻違物裁紙價遷四川參政晉按察使歷  
山東布政使入爲太僕寺卿有去志旋改應天府府尹不欲  
往強爲一行遂決策歸歸二年而卒寇方伯陽志其墓

甄成德字行叔平定人嘉靖戊戌進士授中書舍人擢南京戶科給事中論罷刑部尙書贖賄大旱疏五事改兵科疏備邊五事釐正南京兵制四事論罷兵部尙書其所糾彈皆關大體出補陝西副使奉親養於官值地大震泣然曰區區祿養脫有不幸何以自贖屢疏乞歸長子敬字子一癸丑進士知大名均田賦築堤防節供役朔望率縣尉盟城隍廟以清白矢志陞御史按隴西發摘有成望遷四川僉事升行太僕少卿卒

楊思忠字孝夫平定人嘉靖二十年進士爲禮科給事中二十九年孝烈方后大祥欲預祧仁宗祔后太廟下廷議禮部尙書徐階以爲非禮思忠力贊階議上使人覘知狀及議上嚴旨譴責命階與思忠定二人復據禮對上竟祧仁宗階故

得帝眷獨銜思忠每當遷輒報罷逾三年正旦日食陰雲不見六科公疏賀上摘疏中語詰爲不成文曰思忠懷欺不臣久矣杖百斤爲民隆慶元年起掌吏科三遷右僉都御史巡撫陝西五年改南京戶部右侍郎致仕卒

任鎧字伯堅平定人嘉靖壬子舉人任陝西韓城知縣和平寬大士民咸頌循良改定輿有廉聲升戶部主事歷陝西副使致仕鎧恬雅有器度營居柏井壁懸薛文清像瞻對惟謹琴一張石磬一片環堵蕭然也

趙思城樂平人嘉靖乙丑進士授萊州府推官擢兵科給事中彈劾無所避尋與用事者忤出爲河南驛傳道念百姓供億苦悉請官爲支給遷行太僕寺卿復與用事者忤調湖廣因謝政歸思誠忠謹敢言釋褐後以觀政進士抗言崇信道

流陶仲文建設齋醮不可以示天下世廟雖未從亦不之罪  
後卒以忠直見沮權要不獲大用

王治字本道忻州人嘉靖三十二年進士官行人八載乃遷  
吏科給事中請臨陣斬獲第錄將士功文臣及鎮帥不親搏  
戰者止賜賚從之再遷禮科左給事中隆慶元年偕御史王  
好問覈內府諸監局歲費中官崔敏請止之治力爭不許事  
竣劾中官趙廷玉馬尹乾沒罪詔司禮按問尋上疏陳四事  
一言定宗廟之禮獻皇雖貴爲天子父實未嘗南面臨天下  
雖親爲武宗叔然嘗北面事武宗今乃與祖宗並列設位於  
武宗右未協古典臣以爲獻皇祔太廟不免遞遷若專祀世  
廟則億世不改乞勅廷臣博議一議謹燕居之禮竊聞燕閒  
舉動有非諒闇所宜者宜重之其二亦切直時多臆焉居諫

垣十五載擢太僕卿憂歸卒賜祭葬

傅霖字應期忻州人嘉靖壬戌進士初授吏曹以宗親改壽州知州請罷壽春驛正陽鎮巡檢並協助征島金米遷大名府同知再遷河南僉事備兵睢陳實倉廩簡材用大計爲權貴所搆罷歸神廟卽位謂日者執政徇愛憎刺舉多不厭眾心命所司廉察以名上除平度州知州遷湖廣荆西道會中貴營顯陵費役萬計抗顏與爭並駁其履畝之舉艱歸補遼海兵備道二年復爲同官所搆中以計典弟霈以御史家居抗疏理其冤都御史亦以上聞詔以原官起用卒堅臥弗起居鄉立祭田贍族人煮粥哺飢者

郝璋崞縣人嘉靖壬午舉人授土蔡知縣積粟活民補靈寶爲政寬而不縱嚴而不苟擢知陳州蝗不入境陟大名府同



知尤多惠政民思之

阿其麟代州人嘉靖癸未進士授甯晉知縣三年以峭直罷歸閉戶擁圖史絕跡城市巡撫楊巍訪之於廬再往始一見居蓬華無異編氓

吳嘉會字惟禮別號南里其先楚人國初從太祖北征屯代遂爲代人嘉靖甲午書魁乙未進士授行人升刑部主事辨壩上盜有聲卽署問擢山東僉事振饑築隄禦寇詔賜金帛轉本省參政單縣妖人楊惠等倡亂官兵攻之不克單車詣壘諭之眾悉解散縛渠凶數十人磔諸市東土以甯遷陝西參政未行拜都察院右僉都御史整飭薊鎮邊務在鎮日夜庀戰守具起居庸盡山海關剏修石垣四萬丈甃敵臺烽埃二千六百座有奇分其地爲十區區設參遊兩將軍分統健

卒合之凡八萬人怒馬堅甲長戟利銳于時剗鎮稱虎豹九  
關天下隘云鎮薊七年匹馬不得入塞肅宗褒賚甚優屢晉  
貳本兵因爲相嵩所忌罷歸卒年七十七穆宗遣官諭祭葬  
如卿臣禮著有奏議十卷

王夢弼代州人嘉靖乙未進士歷刑科都給事時楚世子獄  
具詔毋覆奏卽行刑夢弼欲奏同列懼夢弼曰楚獄誠無冤  
但覆奏制也竟三覆奏尋晉都御史巡撫甯夏屢有戰功蔭  
子進官後襲牧畜獲首功最多督帥欲捷報夢弼曰擣巢功  
不與臨陣功同有近例但奏遵例擣巢而已謝歸卒賜祭葬  
如例

胡志夔字潯南安邑人性聰慧嘗夜遇古碑以手摸之得其  
點畫卽成誦通明往驗之不差一字嘉靖甲辰成進士知富

平縣入爲監察御史出按福建當鄉試時冢宰以私人囑峻拒之出爲副使督理河道當事將假修築費充大工力阻其議擢延綏巡撫引榆溪水入塞溉田與大將趙尙協力禦敵城保甯甯塞二堡子承光承裕俱以行誼著孫舜封以解元官上蔡知縣

閻雲望安邑人嘉靖庚戌進士官給事中時倭患孔棘監軍趙文華藉嚴嵩勢誣逮統兵司馬雲望抗疏乞收成命否則墮成功滋賊患忤旨謫歸隆慶初追贈光祿寺少卿

韓士芮城人嘉靖間貢授博興丞剛介自持盡革常例民甚德之升沙河知縣地衝民貧清潔自修比歸老稚臥轍泣留聲聞數里後復肖像祀之

侯居艮字兼山解州人幼負高才邃於學與兄孝廉居震齊

名弟居坤復同登嘉靖丙辰進士時人稱三鳳初授淄川知縣清而有爲治行居第一擢監察御史抗疏請止織造又論大學士殷士儋士儋致仕去出按雲南以人文日起請廣解額如內地論黔國公沐朝弼不法滇人立祠祀焉居坤字至軒累官太僕寺少卿甫四旬卽解組歸居震子加采進士居艮子加地居坤子加乘俱舉人

薛一鶚芮城人嘉靖丙辰進士授戶部主事歷官山東按察司僉事以條陳時事忤當路回籍屢薦不起嘗曰吾以清白貽子孫足矣與鄉人處和易可挹沒之日邑無責賤咸慟惜之

杜璉字汝器平陸人嘉靖辛酉順天經魁壬戌會副孝友正直溫雅博洽授荆門知州興學重農風俗丕變時權貴索沃

壤擲書地下曰我割民田以媚權門獲罪於天多矣遂掛冠歸民思慕之建生祠祀焉

楊一魁字后山安邑人知縣瑄子嘉靖乙丑進士初官行人擢兵科給事中累遷山東右布政使擢副都御史巡撫河南遷南京戶部右侍郎總督糧儲晉工部尙書督理河道時黃淮泛溢漸近陵寢一魁周咨相度謂黃強由於淮弱黃不分則淮不出陵寢不安請開武墩黃壩新河使安瀾入海功成加太子少保尋回京總理部務適經始兩宮土木繁興力爲樽節鄭妃方幸請於乾清宮測建耳殿爲奉御所神宗召言狀一魁奏不敢奉詔京師淫雨城內水壅不行詔拆毀臨街房屋大璫馮保以己居爲屬一魁斥之曰司禮監願違朝廷詔書耶考滿加太子太保已而河決蒙牆忌者遂以蒙牆爲

黃堦力詆之黃堦蒙牆地分兩省時隔九年一魁不辨兩疏  
求去俱蒙旨慰留已忽傳中旨著革職爲民一魁時在朝房  
卽易服策蹇出都門同列多走餞之不顧也一魁操持峻潔  
器宇淵宏位居宮保門庭閒寂後熹宗登極蒙恩賜葬諭祭  
九壇

張守中字大石聞喜人嘉靖己酉舉人初任保定通判遷通  
州知州庚戌之變總制某以敵人勢迫欲入城爲自守計守  
中折以大義拒不納而饋運糧餉士馬皆宿飽事平擢密雲  
兵備還神木副使築邊牆葺神木城皆以身先士卒與同甘  
苦擢僉都御史巡撫延綏一日御一鷹隨一引馬馳百餘里  
至守備城啟倉廩視之穰土強半卽呼首領官令煮食之不  
能因治以軍法兵備譚二華參將戚繼光皆有宿望亦凜凜

奉約束唯謹初至敵頗易之既而出奇計大破其眾相顧駭  
遁莫敢復犯延綏軍士素驕肆守中痛繩之一夜挾弓矢射  
轅門者如林守中高臥不爲動次日早起據堂皇召巡捕官  
問射者無一人敢應尋以勞卒于官加副都御史贈兵部左  
侍郎賜祭葬如例

王宗舜號耕山聞喜人高祖臬刑部主事父澄清河訓導俱  
有聲聞宗舜嘉靖壬子舉人明年成捷進士任衛輝推官執  
法明刑擢湖廣道監察御史卓有風裁不阿權貴有王鐵面  
之稱升臨清道副使遷陝西參政以內艱歸不復出謝賓客  
爲四柳園與稷山梁承齋猗氏何肖山諸人詩酒自適兄宗  
堯癸卯舉人官刑部郎中

甯桂字攀之稷山人瑛曾孫嘉靖辛酉舉人少孤既領鄉薦

家徒四壁居母憂徒跣三年不食菜果不扇不爇任陵縣訓導教重倫行却一切饋遺士人思之升國學晉工部司務戶部員外布袍脫粟躬親操作遷工部郎中卒於邸舍無櫛櫛之資同舍郎賻金歸襯

鄭命字爲命稷山人嘉靖辛酉舉人任宜君知縣中減夫價五百餘金罷土官帶兵徵索之擾禁僚佐私交豪右之弊請振救荒邑人德之謝政歸囊惟圖書衣冠而已子寅字子夏萬曆癸卯舉人長安教諭轉國子監助教遷大理寺評事累升郎中山東按察司僉事

孫光祐絳州人嘉靖壬戌進士授承天推官升文選司郎中歷遷應天巡撫分考鄉闈得蕭良有在選司官惟其人請託不行吳當大水後請蠲夙逋無慮數百萬石妖僧起京口搆



結甚眾光祐殲渠魁餘置不問在蜀故事蜀藩朝賀五叩頭光祐請如制王曰誠如先生言第彰先王之過奈何光祐曰克蓋前愆正在此舉王從之終南京戶部侍郎

翟繡裳字左溪聞喜人嘉靖壬戌進士授雄縣知縣補商邱入爲兵部主事條陳邊計擢關西分巡道回民叛單騎入寶雞諸山寨宣諭之眾皆伏還山東參議轉參政分守遼海還按察使兵備密雲晉山東右布政使擢右僉都御史巡撫順天登山海關牛欄山熊兒峪等城修石塘潘家桃林等口昌平黃花等嶺審子峪鶴子洞等處胥關地方百年大計尋以邊警起力主用兵不合再疏乞致仕築園涑水上聚圖史日夕其中以名檢自勵編族譜置義田優游閭里二十餘年卒姚鏗字鎮遠稷山人嘉靖初貢廉靜寡欲篤學力行任饒陽

知縣單騎赴任居御無異寒士日教民忠孝守法徧植桑棗民利賴之以剛直忤權貴左遷甯夏衛經歷操守愈堅致仕歸杜門讀書不入城市

喬瑞霍州人嘉靖丙戌進士幼聰敏容止端肅屹如山立作文多奇語仕西安府推官每折疑獄多所平反歲饑振救全活數萬人泰府占民田抗法歸之後行取第一以王親例改松江府同知檢勘水田通融錢法升山東濟南知府興學校均賦役百姓樂業升大名兵備兼河道尤練飭武備通利漕渠百姓畏若神明後遷山東左參政清謹之操始終不渝奉表入京卒於途陝之名宦霍之鄉賢並祀焉

以上嘉靖年

戴光啟字仲升祁縣人隆慶辛未進士授會甯知縣省費寬徭履畝均賦修關城擒盜首邑人立祠祀之行取給事中請

臬憲攝馬政請廠庫給關防議撫臣修問刑條例疏太監用  
營馬論劉世延不守法多見採納奉命閱三邊條陳八事遷  
河南參政設方略以振饑民招應募以達潞府轉按察使兵  
備甯夏策要賞敗市之謀論兵丁汰浮之怨督府倚賴之遷  
河南布政致仕葺學宮立書院建文昌閣凡關地方事皆力  
爲之年七十五卒

劉守仁字與居洪洞人隆慶戊辰進士初任戶部主事歷湖  
廣布政司左參政以疾乞休生平勵行孤介恬靜寡營服官  
有賢聲里居逾二十載益自端重輿論稱焉

王體復字陽父太平人隆慶戊辰進士授工部主事督修殿  
閣及通惠河諸大工調戶部裁光祿京場諸蠹冗中璫咸噤  
口不敢一語出爲陝西兵備副使值歲饑條上荒政十二議

開涇水渠灌田二千頃番人入犯單騎入其營宣布朝廷威德悉讐伏引還遷河南按察使强悍斂跡厯陝西布政使入爲順天府尹勦賊中有冒占河田及強求墜地者痛折之擢右副都御史巡撫貴州逆苗楊應龍繫重慶獄上書四川撫臣詭請征倭自贖體復稔其詐疏聞於朝樞府漫視之不爲覆因致仕去未幾兵起始悔不用其謀後薦戶部侍郎未任卒體復事父母孝嘗建遺訓亭藏先世手澤解組後敝車破蓋著有玩易柴門人私謚曰文介子椿以蔭累官柳州知府亦以廉幹著

李尙思字從學曲沃人舉嘉靖戊午鄉試第一隆慶戊辰進士授刑部主事決獄詳審見同舍郎輕署爰書輒深歎息升吏部驗封司郎中不阿附江陵勢繼補文選司疏用江陵所

逐諸賢累升都察院右副都御史巡撫四川除採木之役歲  
饑請振川地連巴隴番虜交伺尙思厚集土漢兵扼險設伏  
虜至殺鹿塘遁去疊茂羌夷白泥楊柳等寨糾松坪大小黑  
水數十落合謀入掠尙思移師于灌口分兵追剿勒石雪嶺  
而還歷升吏部右侍郎再疏乞歸尙思孝友勤儉見義勇爲  
卒贈兵部尙書子永培萬歷己卯解元

因柱字汝石曲沃人隆慶間貢判臨清州清丈地畝煮粥振  
荒修河造船多政績三署州篆及博平泰安又監泰山進香  
稅皆毫無所染升安塞知縣勞心撫字雖災患頻仍靡不就  
理後致仕與弟梓枏和怡敬愛終身同癸卒年八十有四子  
其志萬歷戊子舉人官南皮知縣

高崧甯鄉縣人隆慶丁卯舉人初任知縣歷官眞定府通判

居官清正惟恐不義涉躬

劉東星字子明沁水人隆慶二年進士改庶吉士授兵科給事中以非時考察謫蒲城縣丞徙盧氏知縣累遷湖廣左布政使萬曆二十年擢右僉都御史巡撫保定時征倭師集天津而天津河間皆被災請漕米十萬石平糴民乃濟召爲左副都御史進吏部右侍郎以父老請養歸二十六年河決單之黃堙起工部左侍郎兼右僉都御史總理河漕初尙書潘季馴議開黃河上流循商虞而下歷丁家道口出徐州小浮橋卽元賈魯所浚故道也以費鉅未果東星卽其地開濬起曲里鋪至三仙臺抵小浮橋又濬漕渠自徐邳至宿五閱月工竣費僅十萬進工部尙書兼右副都御史明年渠邳伯界首二湖又明年奏開泇河泇界滕嶧間南通淮海引漕甚便

前總督翁大立尙書朱衡都御史傅希摯屢言之迄無成畫  
河臣舒應龍嘗鑿韓莊工亦中輟東星力任其役初議費百  
二十萬及工起費止七萬而渠已成十之三會疾求去屢旨  
慰留卒後李化龍循其遺跡與李三才共成之漕永便焉東  
星性儉約歷官三十年敝衣疏食如一日天啟初謚莊靖  
趙九思澤州人隆慶辛未進士爲咸甯知縣省刑薄賦視民  
如子聲望大著行取南部尋調北計部升陝西郃陽兵備道  
值年荒流移絡繹下車調停諭檄所部併力墾荒捐俸助牛  
種全活者眾裁班軍五百省州縣供應後解歸布袍蔬水怡  
然自得日手一編不異寒士著讀書樂文

王家屏字忠伯山陰人隆慶二年進士選庶吉士授編修預  
修世宗實錄操江都御史高捷以官帑遺趙文華直書之捷

弟拱時方柄國所稍諱執不可萬厯初進修撰充日講官敷  
奏剴摯上嘗斂容受稱爲端士張居正寢疾詞臣率奔走祈  
禱家屏獨不往再遷侍講學士十二年擢禮部右侍郎改吏  
部甫踰月命以左侍郎兼東閣大學士預機務去史官二年  
卽輔政前此未有也每議事秉正持法不亢不隨越二年遭  
繼母憂詔賜銀幣服闋進禮部尙書請因聖節受賀畢發留  
中章奏舉行冊立皇太子禮不報復偕同官疏請俄遣中官  
獎以忠愛家屏疏謝因復請上勤視朝評事雒於仁進四箴  
帝將重罪之家屏言於仁以庶僚上言而臣備位密勿反緘  
默苟容上虧聖明之譽下陷庶僚蒙不測之威臣罪大矣尙  
可一日立於聖世哉於仁得善去十八年以久旱乞罷極言  
災異寇敵狀且言陛下深居靜攝朝講希臨統計臣一歲間



僅兩覲天顏而已間嘗一進瞽言竟與諸司章奏並寢不行乞賜罷歸用避賢路不報時儲位未定十月閣臣合疏請冊立以去就爭傳論切責時家屏在閣請速決大計上遣內侍李浚傳語期以明年春夏家屏以口勅難據欲特頒詔諭立具草進上不用復諭二十年春舉行家屏喜卽宣示外廷時申時行去國王錫爵亦以省親還家屏遂爲首輔再疏乞罷不允乃視事家屏制行端嚴推誠秉公百司事一無所撓性忠讜好直諫冊立期數更中外議論紛然家屏力請踐大信以塞口語消宮闈釁不報二十年春給事中李獻可等請豫教謫外家屏封還御批力諫帝益怒譴責者相屬家屏遂引疾求罷帝得奏不下而責以希名託疾家屏疏辨帝復遣內侍至邸責以徑駁御批故激主怒家屏言言涉至親不宜有

怒事關典禮不宜有怒臣與諸臣但知爲宗社大計盡言効忠而已豈意激皇上之怒哉於是求去益力或勸少需家屏曰人君惟所欲爲者由大臣持祿小臣畏罪有輕羣下心吾意大臣不愛爵祿小臣不畏刑誅事庶有濟耳遂復兩疏懇請詔馳傳歸家屏柄國止半載又強半杜門以愬直去國朝野惜焉閱八年儲位始定遣官齎勅存問資金幣羊酒又二年卒年六十八贈少保謚文端熹宗立再贈太保子一子尙寶丞家屏家居值朝鮮用兵貽書經略顧養謙曰今第以保會稽之恥激厲朝鮮以城楚邱之功獎率將吏無爲主而爲客則善矣養謙不能用兵竟數年無功其深識有謀皆類此也

萬世德字伯修偏關人幼奇穎登隆慶辛未進士授南陽知

縣遇事迎刃解有疑難以片言折之豪猾吏皆驚歎後補元城寶坻寶坻爲畿輔近地戚里田宅多盤踞世德一無所假借勢家雖怨亦無以難也生有膂力能騎射又長於邊陲習地方要害防禦機宜入爲兵部郎以知兵聞遷陝西按察司僉事備兵西甯遇虜入寇躬擐甲胄督將士禦之五戰皆捷聞副將李魁乘醉率所部遏寇歸路爲所圍急赴援寇皆驚遁以事降補趙州知州遷山東按察司僉事備兵遼左詔仍監陝西幕府軍事世德聞命單車就道決計出師一戰莽刺川再戰水泉口皆大捷又以寇巢穴仰華寺中因提兵出青海馳七晝夜擒其細作焚仰華寺而還遷按察司副使備兵懷隆虜時時闖入邊掠人畜世德偵駐牧所在遣將搗其巢尋遷按察使布政司右布政備兵如故倭奴犯朝鮮朝議於

天津設開府扼登萊旅順諸要地世德遂以邊才進職巡撫都察院右僉都御史專理海防軍務已復經理朝鮮初至戰於杏山破之遂集將士謀大舉命董一元等各統精兵直逼釜山斬獲倭兵將二千四百四十餘人焚其舟七百餘隻獲糧二萬五千九百餘包招回朝鮮難民五千六百餘口捷聞特命總督薊遼尋遷右都御史兼兵部右侍郎總督如故一日聞虜將入寇時世德已病矣授計諸將令各奉指揮戰汛地擒斬甚眾世德才智膽略伯仲咸甯晉溪間在薊遼以息兵甯人爲務寬大簡靜以疾卒於官

孫繼先字蔭甫孟人隆慶五年進士爲南京御史張居正卒繼先請召吳中行趙用賢艾穆沈思孝鄒元標并及余懋學趙應元傅應徵朱鴻謀孟一脈王用汲又薦魏學會宋繡張

岳主綱胡執禮王錫爵賈三近溫純曹科陳有年朱光宇趙  
參魯等諸人並獲進劾戶部尚書張學顏構陷劉臺狀再劾  
學顏及李成梁謫臨清州判官終南京吏部主事

王致祥忻州人隆慶五年進士爲兵科給事中萬曆十二年  
帝集內豎三千人授以戈甲操於內廷尚書張學顏力諫不  
納致祥上言祖宗法非宿衛士不得持寸兵今授羣不逞利  
器出入禁門禍不細大學士申時行亦語司禮監令乘間力  
言帝乃留致祥疏卽日罷之後累官右僉都御史巡撫順天  
趙欽湯字新盤解州人隆慶二年進士博學淹貫初任按察  
令以卓異舉擢戶曹出守鳳翔歲荒振饑兵備甘肅甘俗善  
畜羊欽湯教以業褐送貽永利司臬山東理疑獄多所平反  
累遷浙轄靖倭亂中貴以織礦二役滋擾持法不爲撓播南

勳卿遷應天尹會加賦抗疏止之轉南戶部侍郎總督糧餉酌補餉飭屯政定改折請蠲恤慎預支凡所條陳悉合機宜久之告歸卒諭祭葬贈戶部尚書著有通鑑纂要關公祠志諸書行世

趙三聘字天民河津人隆慶戊辰進士授益都令爲兵備某所忌謫河南藩司照磨尋遷江都令邑苦徭役行條鞭法民稱便丁內艱服闋補獻縣導河俾民無昏墊凡三令薦疏十上升守禹州時中州苦盜嚴行保甲法妖黨株連數郡禹獨無百姓建祠祀之入拜司農郎督餉遼左督府顧冲菴數咨密議特疏薦擢四川按察副使備兵東川引疾歸年六十五卒

許恩字仁甫絳州人隆慶庚午舉人知甯陽募民闢荒給以

牛種逃者咸復業稱樂土起補館陶會潞藩之國取道於陶  
恩名素重諸從者秋毫無犯尋升刑部郎中

裴賜稷山人隆慶辛未進士授兵部主事會上謁陵賜從大  
司馬扈蹕欲輦金從事尙書不可輒輦金以行抵昌平上命  
偏師計數千金倉猝立辦人驚異之遷職方有大璫餽金干  
以私怒斥去庚辰例當典春闈時江陵當國爲其子預授以  
意不應遂易他曹尋出治兵井陘諷言官中以他事謫華州  
知州不赴歸

李廷儀字國瞻霍州人隆慶辛未進士授吳堡知縣調洛川  
入爲兵科給事中民攀臥不忍別肖像祀之在科以剛直著  
先是科臣言事必關白政府然後上廷儀獨不往又抗疏請  
禁中貴陳乞遷吏科左給事中工科都給事中黃河決廷議

紛然延儀折衷羣說能得其要領獲底績出爲河南參政值  
荒旱步禱得雨歲倍有秋酌復司馬溫公兌支法藩衛南陽  
衛兩軍歡聲雷動遷陝西按察使治兵固原擢右僉都御史  
巡撫甘肅甘肅番漢雜處稱要地旣至勤訓練謹斥堠尋以  
鄰封警爲議者波及解組去事白兩臺交章薦卒弗起杜門  
謝客不與外事而禔躬接物恭愼有加其卒也里人皆流涕  
焉

以上隆慶年

右明嘉靖隆慶一百十三人

山西通志卷一百三十